



UPA 2014/36.1
23. april. 2014
Hans Aronsen

Inatsisartut suleriaasianni § 33 naapertorlugu matumuuna Inatsisartut aalajangiiffigisas-
saattut siunnersuut imaattoq saqqummiuppara:

**Upernaviup eqqaani nunaqarfimmi Innaarsunni oqaluffiliornissamut Naalakkersuisut AIS15-imi 10 mio. koruuninik immikkoortitseqqullugit peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Jens Immanuelson, Siumut)**

Siullermik Innaarsummiut Innaarsuniillu kingoqqisut Innaarsuit tunngavilerneqarneraniit ukiuni 100-nngortorsiorneranni qamannga pisumik pilluaqqungaarpakka.

Ilagiittut oqaluffeqarneq ataqatigiinnermik annertuumik misigiffigisarparput ataatsimoorfittullu sapaatsiornitsinni, sapaassuarsiornitsinni, ilagiittullu ileqqunik pitsaasunik soorlu katinnerni, kuisitsinerni, apersortitsinerni, toqukkullu assigiinneqisunik alianartunillu misillersimalluta oqaluffinni ataasimoortarpugut.

Soorlu naalakkersuisut akissumminni siunnersuut itingartinnerani kissaatigigaat sineriak tamakkerlugu ilagiit ilagiinnilu sullissisut sulianut sukumiisumik nalilersuisariaqarnerat, nalilersuereerneramilu nalilersuutigineqartut Namminersorlutik Oqartussanit suleriaqqinnermi tunngavigineqarsinnaasariaqartut. Tamannalu Inuit ataqatigiinniit paasilluarparput.

Ilisimavarpummi sineriassuatsinni ilagiippasuit oqaluffeqarnikkut allatigullu aaqqissuutassanik kissaateqartoqartoq. Naalakkersuisullu suleriarnermi periuseq toqqammavigisaat pitsaasuvoq, taamatullu suleriaaseqarnerup sumiiffinni ilagiit pisariaqartitaannik kissaataannillu tulleriinnilersukkanik sulinermi tunngaviusunik malitseqartarpoq.

Naalakkersuisullu allannguutissatut siunnersuutaat "Oqaluffiup initaa Innaarsunnut naammatsumik angissusilik ilanngullugu illumik assigiinngitsorpassuarnut atorneqarsinnaasumik sanaartornissamut 2014-imi ilassutaasumik aningaasaliinissamik siunnersuummik Naalakkersuisut saqqummiussinissamik peqquneqarnissaannik Inatsisartut aalajangiinissaattut siunnersuut.", soqutiginarsinnaangaluartoq paaseqqaagaqarusuppugut.

Naalakkersuisunut apeqqutigerusupparput sumiiffimmi oqaluffiliornissamik siunnersuuteqarfiusumi kommuniusup 2015-mi tamatumalu kingorna sanaartungassanut kissaataai suunersut, suut inuiaqatigiinni aningaasassaaleqissunneqartut pisariaqavissullu pisariaqartinneqarpat.

Qaasuitsup kommuniani 40 tungaannut inoqarfilimmi oqaluffeqarnikkut atuarfeqarnikkut meeqquqarveqarnikkut, utoqqaat inissiaqarnikkut, utoqqaat illoqarnikkut aammalu inuusutissarsiutinut allarpassuartigullu kissaateqartoqarpoq. Taamaaattumik kommunip kissaatinut tulleriinnilersuinerata takooqqaartariaqartoq Inuit Ataqatigiinniit isumaqarpugut.

Taamatut oqaaseqarluta siunnersuut itingartipparput, aammalu naalakkersuisut allannguutissatut siunnersuutaat itigartillugu.